

**OINARRI ESPEZIFIKO ARAUTZAILEAK: ERRENDIMENDUKO BANAKAKO KIROLARIENTZAKO  
DIRULAGUNTZAK EMATEA. 2026. URTEA**

**XEDAPEN OROKORRAK**

**LEHENENGOA. - Oinarrien xedea:** Oinarri hauen xedea da Erandioko Udaleko 2026ko dirulaguntza zehatz batzuk emateko prozedura arautzea, deialdi ireki eta lehiaketa bidez izapidetuko dira, errendimenduko banakako kirolarientzat, Erandioko Udalak dirulaguntzen plan estrategikoan finkatutako helburuen arabera egingo da guztia.

**BIGARRENA. - Finantzaketa:** Deialdi honen xedea betetze aldera, finantzaketa 6.000 €-koa izango da, gehienez, ere, partida honetan zorduntzeko: 35-3411-48006 (Kirolaren sustapena: Errendimendu handiko kirolarientzako laguntzak).

Dirulaguntza emateko epea bukatzean, eman zitekeen gehieneko zenbatekoa ez bada agortu, kopuru hori beste finantzaketa-ildo batzuetara bideratu ahal izango da, diru nahikorik ez badago, edo emandako zenbatekoak handitu ahal izango dira, beste deialdi bat egin beharrik gabe.

Arestian ezarritako hori gauzatzeko ezinbesteko baldintza izango da aurrekontuetan kreditu nahikoa egotea eta, bidezkoa izanez gero, dirulaguntza emateko erabakia hartu aurretik aurrekontuari dagokion kreditu aldaketa onartzea.

Oinarri hauen arabera emandako dirulaguntzak eta helburu berberaz beste erakunde publiko nahiz pribaturen batek emandakoak bateragarriak izango dira, baina ezingo da jaso diruz lagundutako ekintza burutzeko aurrekontuan adierazitakoa baino diru gehiago. Hori gertatuz gero, emandako dirulaguntza gutxitu egingo da, diruz lagundutako proiektuaren kostu osoaren zenbatekora arte. Ekintzaren gehiegizko finantzaketa gertatuz gero eta dirua atzera itzuli behar bat baino gehiago izanez gero, Erandioko Udalak egindako ordainketa osoaren arabera dagokion diru kopurua itzuli beharko du onuradunak.

**HIRUGARRENA. Onuradunak:** Dirulaguntzaren onuraduna izan daiteke Erandion bizilekua duen (gutxienez hiru urteko antzinatasunarekin) eta errendimendu handiko kirol-jardueraren bat egin nahi duen edozein pertsona fisiko.

Diruz lagunduko diren gastuak honakoak dira:

- Leku-aldatzeen dietak eta gastuak. Joan-etorria norberaren autoan eginez gero, kilometroaren prezioa 0,26€-koa izango da.
- Lehiaketen herrietan edo bidean hartutako ostatuak.
- Dirulaguntzaren onuraduna adingabea edo % 33ko edo gehiagoko desgaitasuna duen pertsona bada, laguntzaile baten aurreko bi kontzeptuen gastuak ere diruz lagunduko dira.
- Interesdunak praktikatzen duen kirolerako beharrezko material espezifikokoak.
- Dirulaguntzaren xedeko lehiaketetan izena ematea.
- Ohiko entrenamenduetarako espazioen alokairu-gastuak.

Banakako edozein kirolari izan daiteke dirulaguntzaren onuradun. Horrela izanik, kanpo geratzen dira talde-kiroletan aritzen direnak, **txapelketatako azken erronda edo nazio edota nazioarte mailako probetan aritzen direnak**. Gainera, onuradun izan ahalko dira **errendimendu handiko nazioarteko espedizioetan parte hartzen duten kirolariak, baldin eta leku horietan bakarrik egin ahal badira**. Kirol modalitatetzat

hartuko dira Kirolen Goi Kontseiluak hala aitortutakoak, edota Eusko Jaurlaritzako Kirol Zuzendaritzaren modalitate-katalogoan barne hartutakoak.

**Eskatzailea dagokion kirol modalitatean federatuta egon beharko da.**

**LAUGARRENA. - Dirulaguntzaren zenbatekoa kalkulatzeari:** Kirolariak lortutako puntuazioaren arabera dirulaguntzaren zenbatekoa zehazteko, honako faktore hauek hartuko dira kontuan:

1. Diruz lagundu daitekeen jardueraren aurrekontua.
2. Proiektu horretarako eskatutako laguntzaren zenbatekoa.
3. Aurkeztutako aurrekontuaren eta eskatutako laguntzaren arteko aldea (autofinantzaketa).

Proiektu batek gehieneko puntuazioa lortuz gero, eskatutako laguntzaren % 100a jasoko du, betiere, laguntzen kopuru osoari erantzuteko aurrekontu nahikoa bada. Horrela ez bada, eskaeren arteko hainbanaketa egingo da, aurrekontuaren arabera egokitzeke.

Proiektuak ez badu gehieneko puntuazioa lortzen, eskatutako kopuruaren portzentajearekin lortutako puntuen portzentajea kontuan hartuz kalkulatu da dirulaguntza.

Edonola ere, sistema honen bidez kirolari bakoitzari emango zaion gehieneko dirulaguntza 700€-koa izango da.

Formula horren arabera kalkulatu diren laguntzen batura sailaren aurrekontua baino baxuagoa balitz, hiruko erregela bat aplikatuko litzateke, eskaera bakoitzeko 1.000 €-ko gehienekora arte, guztien artean soberakina banatzeko, betiere kirolariak zenbateko hori edo gehiago eskatu badu.

**BOSGARRENA. - Eskabideak aurkeztea:** Eskabidea Erandioko Udaleko alkate-udalburuari zuzenduko zaio eta Erandioko Udalaren egoitza elektronikoaren bidez edo HAZ bulegoetan aurkeztuko da, Administrazio Publikoen Administrazio Prozedura Erkidearen urriaren 1eko 39/2015 Legearen 14. artikuluan jasotakoaren arabera, hilabeteko epean, deialdia Bizkaiko Aldizkari Ofizialean argitaratu eta hurrengo egunetik aurrera.

Ez da eskaera aztertuko eta ez da dirulaguntzarik emango interesdunak ez badu aurretiko edozein dirulaguntza epean justifikatu.

**SEIGARRENA. - Eskabidearekin batera aurkeztu beharreko agiriak:** Eskatzaileak aurretik Erandioko Udalaren dirulaguntzaren bat eskuratu badu, honako dokumentazioa aurkeztu beharko du:

- a) Dirulaguntza normalizatuaren eskaera, derrigorrez PDF formatuan. Eskaera dokumentua eta proiektuarena bete behar dira.
- b) Erandioko Udalak kontsulta egingo die zuzenean beste administrazioei eskatzaileak zerga betebeharrak egunean dituela egiaztatzeke eta Gizarte Segurantzako datuak konprobatzeke, pertsonarenak. Hori ados ez balego, dagozkion ziurtagiriak eman beharko lituzke (I. Eranskina)
- c) Dirulaguntzaren onuradun izateko moduko egoeran egotea egiaztatzen duen erantzukizunpeko adierazpena. (III. Eranskina)

Kirolari horiek aurretik adierazitako proba edo txapelketetan parte hartzen dutela egiaztatzeke, federazio-fitxa aurkeztu beharko dute, baita diruz lagundu daitezkeen proba edo lehiaketetarako izen-emateen ziurtagiriak ere.

Pertsona eskatzaileak dirulaguntza lehen aldiz eskatzen badu, aurreko guztiaz gain, honakoa aurkeztu beharko du:

d) Nortasun-agiriaren fotokopia.

e) Banku-entitate batek emandako dokumentua, kontu korrontearen titulartasuna egiaztatzen duena. (II. Eranskina)

**ZAZPIGARRENA. - Eskerak baztertzea:** Ez dira kontuan hartuko epez kanpo aurkeztutako eskabideak, PDF formatuko eskabide normalizatuan aurkeztu ez direnak, lerro bakoitzean diruz lagundu daitezkeen xedeekin bat ez datozenak, ezta Erandioko Udalak aurretik emandako dirulaguntzak egiaztatzeko agiriak eta/edo azalpen-memoria aurkeztu gabe dituzten pertsonen aurkeztutakoak ere.

**ZORTZIGARRENA. - Osatu gabeko edo okerreko eskaerak:** Eskabidearekin batera aurkeztutako dokumentazioak zerbait falta badu edo konpontzeko moduko hutsik izanez gero, hutsak zuzentzeko deia egingo zaio eskatzaileari. Horretarako, gehienez ere 10 laneguneko epea izango du eskatzaileak, hutsak zuzentzeko adierazpena jaso eta hurrengo egunetik zenbatuta. Horrela egin ezean, eskabidea bertan behera geratuko da.

**BEDERATZIGARRENA. – Emateko prozedura:** Orain deitutako dirulaguntza lehiaketa bidezkoa izango da. Aurkeztutako eskaerak ebaluatuko dira eta gerora lehentasunen ordena markatuko da, deialdiaren balorazio-irizpideen arabera. Edonola ere, dirulaguntza emango bada, derrigorrezko baldintza izango da emakidaren ebazpenaren momentuan kreditu egoki eta nahikoa izatea.

**HAMARGARRENA. Balorazio-irizpideak:** Balorazio-irizpideak hauek izango dira (100 punturen gainean):

1.- Kirolariaren diziplina **euskal kirol tradizionalen** modalitatetzat hartzea (5 puntu).

2.- **14 eta 24 urte bitarteko kirolaria** izatea. Kontuan izango da deialdia argitaratzen den urteko urtarrilaren 1ean kirolariak daukan adina (5 puntu).

3.- Laguntza hau **eskatzen duten emakumeei** lehentasuna emango zaie, 4/2025 Legea betez, otsailaren 18koa, Gizon eta Emakumeen Berdintasunerakoa. Emakumeen kirola sustatzea da xedea, izan ere, errendimendu handiko kirolean emakumeek ordezkari txikia dute, eta etorkizuneko neskatila eta emakume kirolarientzako erreferenteak sortu nahi dira (10 puntu).

4.- **Ehuneko 33ko desgaitasuna edo hortik gorakoa** izatea (10 puntu).

5.- **Entrenamenduen maiztasuna** (gehienez 15 puntu):

- Entrenamenduak:

\*Astean hiru entrenamendu edo gehiago (15 puntu)

\*Astean bi entrenamendu (10 puntu)

\*Astean entrenamendu bat (5 puntu)

\*Astean entrenamendu bat baino gutxiago (0 puntu)

6.- **Kirol merituak** (55 puntu gehienez).

a) Dirulaguntzaren xedea lehiaketetan parte hartzea den kirolarien kasuan, puntuazio handieneko kirol-meritua soilik izango da kontuan (gehienez ere 55 puntu):

Kontuan izanda deialdi hau argitaratu aurreko urteko urtarrilaren 1etik abenduaren 31ra bitarteko emaitzak (gehienez 55 puntu):

- Txapelketak/Open/Zirkuituak/Nazioarteko ligak:

- \*1. postua: 55 puntu
- \*2. postua: 53 puntu
- \*3. postua: 51 puntu
- \* Parte hartzea: 48 puntu

- Txapelketak/Open/Zirkuituak/Estatuko ligak:

- \*1. postua: 50 puntu
- \*2. postua: 48 puntu
- \*3. postua: 46 puntu
- \* Parte hartzea: 40 puntu

b) **Espedizioetan edota nazioarteko kirol ekitaldietan** parte hartzeko xedea duten kirolarien kasuan (gehienez 55 puntu):

- \*Erandioztarra den inork ez du egin lehenago horrelako jarduerarik: 55 puntu.
- \*Erandioztar gutxik egin dute lehenago horrelako jardueraren bat: 40 puntu.
- \*Jarduera normal bat da: 35 puntu.

**HAMAIKAGARRENA.- Instrukzioa eta ebazpena:** Oinarri espezifiko hauetan jasotako laguntzak emateko instrukzio-organoa kirol saileko teknikariak izango dira.

Ebazpen-proposamena egiteko organo eskuduna kirol saileko teknikariak izango dira.

Alkatetza da dirulaguntzak ebazteko aginpidea duen organoa. Erabakia hartu eta jakinarazpena egiteko epea hiru hilabetekoa izango da. Deialdia egiten denetik zenbatuko da epea, bestelakorik ez bada zehazten deialdian bertan, hau da, eragina osteko beste egun batera atzeratzea.

Dirulaguntzaren emakidari buruzko ebazpenean honako alderdi hauek agertuko dira:

- Zein eskatzaileri emango zaion dirulaguntza.
- Gainerako eskabideen ezeste arrazoitua.
- Dirulaguntza emateko erabilitako xedapena.
- Dirulaguntzaren enbatekoa eta ordainketamodua eta epeak.
- Bidezko errekursoak, horiek aurkezteko organoak eta horretarako epea.

Edozein kasutan, gerta daiteke dirulaguntza emateko baldintzak aldatzea edo beste erakunde publiko edo pribatu batzuek norgehiagoka bidez eman ohi dituzten laguntzak edo dirulaguntzak lortzea, gainfinantzazioa sortuz; halakoetan, horrek berekin ekar dezake emandako ebazpena aldatzea eta, hala badagokio, emandako dirulaguntza itzuli behar izatea.

Behin dirulaguntzari buruzko ebazpena emanda, onuradunak horren edukiaren aldarazpena eskatu ahal izango du, honako arrazoiak direla eta:

- 1.- Onuraduna izateko beharrezko beharkizunak funtsean aldatu direlako.
- 2.- Dirulaguntza arrazoitu duten zirkunstantzia objektiboak aldatu direlako.

3.- Dirulaguntza eskuratzeko pertsona edo erakunde onuradunek aurkeztutako proiektuak aldatu direlako.

Ebazpena aldatzeko eskabidea jarduera egiteko epea amaitu baino lehenago aurkeztu behar izango da.

Dirulaguntzak emateko ebazpenak emango dio amaiera administrazio-bideari.

Gehienezko epea igaro eta ebazpen adierazia interesatuei jakinarazi ez bazaie, eskaria administrazio-isiltasunez ezetsizat joko da.

**HAMABIGARRENA.- Jakinarazpena eta argitara ematea:** Ebazpena emanda, pertsona edo erakunde onuradunei jakinarazi egin beharko zaie, Administrazio Publikoen Administrazio Prozedura Erkideari buruzko Legearen (urriaren 1eko 39/2015 Legea) 40. artikuluan eta hurrengoetan ezarritakoaren arabera. Erandioko Udalak dirulaguntzak eman ahal izateko, emakidaren azalpena eman beharko du udaleko iragarki taulan, eta Bizkaiko Aldizkari Ofizialean argitaratu beharko du ebazpenaren laburpen bat, eduki osoa jendaurrean zein tokitan dagoen adieraziz; hori guztia Erandioko Udalaren webgunean ere emango da argitara.

**HAMAHIRUGARRENA.- Dirulaguntza ordaintzea:** Dirulaguntzaren xede den jarduerari dagokion justifikazioa egin aurretik egin daiteke bidezko den ordainketa. Horretarako ezinbestekoa da onuradunak dirulaguntza aurreratzeko eskaria egitea, eta egingo dituen ekintza guztien aurrekontu zehatza aurkeztea (parte hartuko den lehiaketa eta ekitaldien aurreikuspena). Ez da inolako bermerik eskatuko. Dirulaguntza emateko erabakia hartu eta 45 eguneko epearen barruan egingo du Udalak bidezko den ordainketa, onuradunak eskaera orrian adierazitako banketxeko kontu-zenbakian.

Dirulaguntzaren zenbatekoa ez da ordainduko honako kasu hauetan:

- a) Onuradunak zerga zorrak edota Gizarte Segurantzarekiko zorrak ordainduta ez dituenean.
- b) Itzulketa egiteko ebazpena dela-eta zorduna denean.

**HAMALAU GARRENA.- Dirulaguntza zuritzea:** Onuradunak ondoren adieraziko diren agiriak aurkeztu beharko ditu jaso duen dirulaguntza zuritzeko, **2027ko urtarrilaren 31 baino lehen:**

1.- Diruz lagunduriko xedea bukatzen denean, dokumentu bat entregatu beharko da dirulaguntza behar bezala erabili dela ziurtatzeko.

2.- Horretarako, honako agiri hauek aurkeztu beharko dituzte:

- a. Garatutako proiektu/xedearen memoria, eredu ofizialaren arabera (IV. Eranskina). Barne izan beharko ditu proiektuaren garapenaren deskribapen laburtua, eta gutxienez azaldu beharko da aurreikusitako moduan egin den, izan diren laguntzak eta zailtasunak, aurreikusitakoarekiko egindako aldaketa posibleak, hartzailen kopurua eta karakterizazioa eta helburuen lorpen-maila, baita diru-sarrera eta gasuen balantzea ere.
- b. Proiektua burutzeko gastu guztiak islatzen dituen justifikazio-kontua eta **Erandioko Udalak diruz lagundutako kopuruari dagozkion** gastuen zerrenda zenbakitua eta sailkatua, jatorrizko egiaztagiriek batera. Egiaztagiri horiek fakturak edo merkataritzako trafiko juridikoan balioa duten froga-balio bereko beste dokumentu batzuk izango dira. (V. Eranskina).
- c. Diruz lagundutako eta eskatzaileak parte hartutako jarduera edo ekitaldia dela-eta editatu edo argitaratu diren liburuxka, kartel, liburu, bideo eta abarren ale bana ematea.

3.- Jarduera beste edozein erakunde publiko edo pribatuk beste laguntza edo baliabide batzuekin batera finantzatu badu, justifikazioaren parte gisa egiaztatu beharko da funts horiek bidezkoak direla eta diruz lagundutako jardueretan erabili direla. (IV. Eranskina).

4.- Dirulaguntza egiaztatzeko eskumena duen organoak beste edozein dokumentu eska dezake dirulaguntzaren erabilera egokia eta diruz lagundutako proiektuaren garapena egiaztatzeko. Era berean, eskaera baloratzeko emandako datuak benetakoak direla konprobatzeko beste edozein dokumentu ere eska dezake.

5.- Dirulaguntza egiaztatzeko eskumena duen organoak ikusten badu onuradunak egindako justifikazioan zuzentzeko moduko akatsak daudela, horren berri emango dio, eta hamar eguneko epea emango dio zuzentzeko.

**HAMABOSGARRENA. - Egiaztatzeko zenbatekoa:** Diruz lagundutako proiektu bakoitzaren aurrekontuaren % 100eko gastuaren berri emango da. Erandioko Udalak diruz lagundutako kopurua faktura edo dokumentu baliokide bidez egiaztatuko da eta gainerakoa (diruz lagundu gabea) memorian zein egiaztapen-kontuan islatuko da.

Aurkeztutako egiaztapen guztien data dirulaguntzaren xedeko jardueren ekitaldi ekonomikoarena izango da.

Itzulketa egiteko, dirulaguntzen emakida arautzen duen udal ordenantza 23. artikulua hartuko da kontuan. Osoko bilkuran hartutako akordio bidez onartu zen. 2023ko martxoaren 23ko BAO, 52. Zk.

#### **HAMASEIGARRENA.- Onuradunen betebeharrak:**

**LEHENENGOA.** - Legeriak edo deialdi zehatz bakoitzak eska ditzaketenez gain, Erandioko Udalak emandako dirulaguntza baten onuradunak diren pertsonak ezinbestean bete beharko dituzte honako hauek:

- a) Helburua bete, proiektua gauzatu, aurreikusitako jarduera eginez edota dirulaguntzaren emakidak funtsatzen duen portaera izanez.
- b) Organo eskudunaren aurrean egiaztatzea betekizunak eta baldintzak bete direla, bai eta proiektua egin dela eta dirulaguntza emateko edo baliatzeko helburua bete dela ere. Hori egiaztatu ezean, Erandioko Udalak ezin izango dio beste dirulaguntzarik eman.
- c) Diruz lagundutako proiektua garatzeko eta bere zehaztapenak betetzeko behar diren baimen guztiak lortzea.
- d) Organo emaileak egin beharreko egiaztapen-jarduerak onartzea, hala badagokio, bai eta kontrol-organo eskudunak egin dezaketen finantza-egiaztapen eta -kontrolko beste edozein jarduera ere, eta aurreko jarduerak gauzatzeko eskatzen zaion informazio guztia ematea.
- e) Diruz lagundutako proiektuak finantzatzeko beste dirulaguntza, laguntza, diru-sarrera edo baliabiderik lortu bada, horren berri ematea. Jakin bezain laster eman beharko da horren berri, eta, nolahi ere, jasotako funtsei emandako erabilera justifikatu aurretik.
- f) Dirulaguntza emateko ebazpen-proposamena eman aurretik, zerga-betebeharrak eta Gizarte Segurantzarekikoak eguneko dituela egiaztatzea, erregelamenduak zehaztutako moduan.

- a. Udalak berak egiaztatuko du onuradunak Erandioko Udal Ogasunarekin dituen betebeharrak egunean dituela. Zerga-betebeharrak betetzen ez badira, hamar eguneko epea emango da betebeharrak horiek betetzeko, oinarri arautzaile espezifikoek beste eperen bat xedatzen dutenean izan ezik.
- g) Kontabilitate-liburuak, erregistro izapidetuak eta gainerako dokumentuak behar bezala ikuskatuta izatea, onuradunari kasu bakoitzean aplikatu beharreko merkataritzako eta sektoreko legeriak eskatzen duen moduan, bai eta dirulaguntzen oinarri arautzaileek eskatzen dituzten kontabilitateko egoera-orri eta erregistro espezifiko guztiak ere, egiaztatzeko eta kontrolatzeko ahalmenak behar bezala baliatzen direla bermatzeko.
- h) Jasotako fondoen aplikazioa justifikatzeko dokumentuak gordetzea, dokumentu elektronikoak barne, egiaztatze- eta kontrol-jardunen xede izan daitezkeelako.
- i) Diruz lagundutako proiektuaren zabalkundean adieraztea Erandioko Udalak laguntza eman duela, euskarri guztietan Udalaren identifikazio-logotipoa jarritz.
- j) Jasotako funtsak itzuli beharko dira, dirulaguntzak emateari buruzko Erandioko Udalaren Ordenantza Arautzailean eta Dirulaguntzei buruzko 38/2003 Lege Orokorraren 37. artikuluan jasotako kasuetan.
- k) Dirulaguntza onartzea, ondorioetarako. Besterik adierazi ezean, emakida jakinarazi eta gehienez ere hamabost eguneko epean berariaz uko egiten ez bada, onartutzat joko da.
- l) Garatu beharreko jarduera motan aplikatu beharreko indarreko araudi espezifikoak betetzea.
- m) Eskatzen zaion kasuetan, Udalarekin lankidetzan aritzea, dirulaguntzaren xedeari buruzko beharrezko informazioa emanez, eta behar diren ikuskapen-jarduketak egitea.
- n) Erandioko Udalari berri ematea dirulaguntza emateko aintzat hartutako edozein egoera objektibo zein subjektibo aldatuz gero.
- o) Eduki politiko edo erreibindikazioko elementurik ez sartzea, edozein joeratakoa dela ere, diruz lagundutako jarduerarekin zerikusia duten argitaratutako idazki, iragarki, ohar, propaganda eta bestelako komunikazioetan (ahozkoa nahiz idatzizkoa izan). Era berean, ez da pankarta edo bestelako elementurik erakutsiko diruz lagundutako proiektuaren egin bitartean.
- p) Proiektua garatzean, pertsonaren oinarritzko eskubideekiko behar den errespetua erakustea eta indarrean diren legeak errespetatzea.
- q) Udal jardueretan aktiboki parte hartzea, Udal Kirol Sailak hala eskatzen badu, eta herrian kirola sustatzeko egiten diren ekimenetan parte hartzeko prest azaltzea, esaterako, Kirol Astea.
- r) Kirola sustatzeko jardueretan parte hartzea, hala nola ikastetxeetan antolatzen diren tailer edo hitzaldiak, edota Erandioko Udalak antolatutako udalekuak, Kirol Sailak hala eskatzen badu.
- s) Baimenean ezarritako hizkuntza-arauak eta -irizpideak betetzea, eta diruz lagundutako proiektuak sortutako dokumentu, euskarri, publizitate eta ekitaldi publikoetan bi hizkuntza ofizialak erabiltzea.
- t) Hizkuntzaren eta irudien erabilera ez-sexista egitea.
- u) Aplikatu beharreko indarreko araudi guztia errespetatzea. Bereziki 4/2005 Legea, otsailaren 18koa, Emakumeen eta Gizonen Berdintasunerakoa.
- v) Erandioko Udalak dirulaguntzaren erabilera egokia eta diruz lagundutako proiektuaren garapen egokia bermatzeko ezartzen dituen beste batzuk.

#### **HAMAZAZPIGARRENA.– Interpretazioa.**

Oinarri hauen interpretazioan sortu daitekeen edozein zalantza Alkatetzak ebatziko du.

Oinarri hauetan aurreikusi gabeko guztirako, kontuan izango da dirulaguntzen emakida arautzen duen udal ordenantza, osoko bilkuran hartutako akordio bidez adostua, 2021eko otsailaren 10eko BAOn argitaratua, 27. zk. Gainera, kontuan izango da Dirulaguntzei buruzko 38/2003 Legea, azaroaren 17koa, eta horren Araudia, 887/2066 Errege Dekretu bidez onartua, eta honako lege xedapenetan ezarritakoa:

11/99 Legea, apirilaren 21ekoa, Toki Araubidearen Oinarriak arautzen dituen apirilaren 2ko 7/85 Legea aldarazten duena, 781/86 Errege Dekretua, apirilaren 18koa eta 39/2015 Legea, urriaren 1ekoa, Administrazio Publikoen Administrazio Prozedura Erkidearena ( 114.1, 123 eta 124 artikulua).

**HAMAZORTZIGARRENA.- Indarreen jartzea.**

Bizkaiko Aldizkari Ofizialean argitaratzen den egunaren biharamuna.

Erandio, 2026ko maiatzak 7.